



## **MEMORIA XUSTIFICATIVA DO CONVENIO DE COLABORACIÓN ENTRE A VICEPRESIDENCIA PRIMEIRA E CONSELLERÍA DE PRESIDENCIA, XUSTIZA E TURISMO, EN REPRESENTACION DA AXENCIA DE TURISMO DE GALICIA, A CONSELLERÍA DE MEDIO AMBIENTE, TERRITORIO E VIVENDA E O CONCELLO DE FOLGOSO DO COUREL PARA A ADECUACIÓN DA “AREA RECREATIVA DE MOGOXE”**

A Lei 7/2011, de 27 de outubro, do turismo de Galicia, establece que a Xunta de Galicia, propiciará unha ordenación racional, equilibrada e sustentable dos recursos turísticos co obxectivo de garantir o equilibrio territorial e, para conseguir este fin, establecerá as pertinentes canles de cooperación con outras administracións tanto estatais como autonómicas e locais, así como co sector privado.

A Axencia de Turismo de Galicia é a entidade da Xunta de Galicia á que lle corresponde o exercicio, entre outras, das competencias en materia de ordenación, promoción, xestión e fomento do turismo.

A Consellería de Medio Ambiente, Territorio e Vivenda é o órgano da Administración Autonómica que ten atribuído o exercicio das competencias en materia de medio ambiente e conservación da natureza, de conformidade co establecido no Decreto 42/2019, do 28 de marzo, polo que se establece a estrutura orgánica desta consellería.

### **Antecedentes:**

A Axencia de Turismo de Galicia ten entre os seus obxectivos básicos levar a cabo accións de potenciación e desenvolvemento do turismo na Comunidade Autónoma de Galicia, como un factor de crecemento económico, polo que entre as súas prioridades está a de contribuír á realización de actuacións que impliquen conseguir este obxectivo.

A Comunidade Autónoma de Galicia ten competencias para establecer normas adicionais sobre a protección do medio ambiente segundo o artigo 27.30 do Estatuto de Autonomía (Lei orgánica 1/1981, do 6 de abril), en consonancia co artigo 149.1.23 da Constitución Española e co Real decreto 167/1981, do 9 de xaneiro, de transferencias e competencias da Administración do Estado á Xunta de Galicia en materia de conservación da natureza, 1234/1983, do 20 de abril, de adaptación de transferencias efectuadas á Xunta de Galicia en materia de conservación da natureza e 1535/1984, do 20 de xuño, de ampliación e adaptación das funcións e servizos do Estado á Comunidade autónoma de Galicia en materia de conservación da natureza, mediante os que se regula o traspaso de funcións e servizos á Comunidade Autónoma en materia de agricultura, pesca e conservación da natureza.





A Consellería de Medio Ambiente, Territorio e Vivenda, en virtude do establecido no decreto da súa estrutura orgánica, ten atribuída a competencia en materia de conservación, protección, uso sustentable, mellora e restauración do patrimonio natural e da biodiversidade de Galicia.

Dentro do mencionado ámbito competencial constitúe un dos obxectivos a adopción de medidas necesarias para garantir o desenvolvemento socioeconómico dos espazos naturais protexidos, a divulgación dos valores do patrimonio natural, así como o desenvolvemento e dinamización do uso público e recreativo do medio natural.

O Concello de Folgoso do Courel exerce igualmente competencias, nos termos da lexislación do Estado e das Comunidades autónomas, entre outras, en materia de medio ambiente, conforme recolle a Lei 5/1997, do 22 de xullo de réxime local de Galicia (artigo 80.2.f).

**Finalidade:**

Para os efectos sinalados, tense previsto formalizar co Concello de Folgoso do Courel o instrumento convencional arriba referido por un período de vixencia que abrangue dende o día seguinte ao da súa sinatura ata o 31 de decembro 2022.

O convenio ten por obxecto establecer as condicións para acordar a colaboración entre a Axencia de Turismo de Galicia, a Consellería de Medio Ambiente, Territorio e Vivenda (en adiante CMATV) e o Concello de Folgoso do Courel para o proxecto de construción dunha área recreativa á beira do río Lor no lugar de Mogoxe, Concello de Folgoso do Courel que ten como finalidade a creación dun destino turístico que permitiría dotar ao municipio dunha zona de baño e lecer que complemente o atractivo fundamental da zona, que é o seu patrimonio natural e etnográfico.

As actuacións definidas no dito proxecto de construción están xustificadas tanto dende o punto de vista da fixación da poboación, mellorando a súa calidade de vida, como dende o punto de vista de contribuír a aumentar o atractivo turístico da zona.

De acordo co inventario do patrimonio municipal a parcela é de propiedade municipal existindo dispoñibilidade para licitar e executar as obras. As actuacións complementarias de creación dunha parada de transporte público desenvólvese en terreos de carácter público propiedade das administracións titulares das estradas.

O Concello de Folgoso do Courel cumpre con todos os requisitos establecidos no artigo 10 da Lei 9/2007, do 13 de xuño, de subvencións de Galicia para obter a condición de beneficiario e cumpre co deber de remisión ao Consello de Contas das contas xerais de cada exercicio de acordo co artigo 4 do Decreto 193/2011, do 6 de outubro, polo que se regulan especialidades nas subvencións ás entidades locais galegas.





A Xunta de Galicia achega á finalidade deste convenio un total de trescentos mil euros (300.000 €), que se reparte nun 50% entre a Axencia de Turismo de Galicia e a CMATV.

O Concello de Folgoso do Courel asume con cargo ós orzamentos de gastos da corporación local, un total de noventa e nove mil seiscientos corenta e dous euros e noventa e tres céntimos de euros (99.642,93€) que se destinan a gastos derivados da obra de execución da area recreativa.

### ORZAMENTO XERAL

Concepto	Base	IVE	Total
Orzamento base de licitación	308.775,41	64.842,84	373.618,25
Honorarios facultativos	21.508,00	4,516,68	26.024,68
Orzamento xeral	330.283,41	69.359,52	<b>399.642,93</b>

### FINANCIACIÓN

Anualidade	2021	2022	Total
Vicepresidencia 1ª e Consellería de Presidencia, Xutiza e Turismo	150.000,00€	0,00	150.000,00€
Consellería de Medio Ambiente, Territorio e Vivenda	150.000,00€	0,00	150.000,00€
Concello de Folgoso do Courel	39.857,17€	59.785,76€	99.642,93€
<b>Total</b>	<b>339.857,17€</b>	<b>59.785,76€</b>	<b>399.642,93€</b>

A Axencia Turismo de Galicia achega ao presente convenio a cantidade de cento cincuenta mil euros (150.000€) con cargo á aplicación 05.A2.761A.760.0, dos orzamentos xerais da Comunidade Autónoma de Galicia para o ano 2021, código de proxecto 2015 00006.

Pola súa parte a CMATV achega a cantidade de cento cincuenta mil euros (150.000€) con cargo á aplicación orzamentaria 08.03.541B.760.0 dos orzamentos xerais da Comunidade Autónoma de Galicia para o ano 2021, código de proxecto 2015 00241, "Infraestruturas de saneamento, protección e mellora do medio ambiente".





Por todo o anterior, entendendo por convenio o acordo de vontades adoptado por escrito entre as partes asinantes que o subscriben nun plano de igualdade, para a consecución de fins de interese común en competencias que lle son propias, e tendo en conta os principios de información mutua, a cooperación e a colaboración que inspiran as relacións das administracións públicas, en consideración a razón de interese xeral e dadas as circunstancias concorrentes, xustifícase a dificultade da súa convocatoria pública, de conformidade co previsto no artigo 26.2.a) da Lei 9/2007, do 13 de xuño, de subvencións de Galicia.

Polo exposto, estímase xustificada a utilización do instrumento do convenio para articular as actuacións de referencia, quedando o devandito convenio fóra do ámbito de aplicación da Lei 9/2017, de 8 de novembro, de contratos do Sector Público, pola que se traspón ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014, con independencia de que, de acordo co previsto no artigo 4 da devandita norma, lle sexan de aplicación os principios desta lei para resolver as dúbidas e lagoas que puidesen presentarse.

Para a tramitación do convenio, tense observado o cumprimento dos requisitos establecidos na Lei 40/2015, do 1 de outubro, de réxime xurídico do sector público.

Asinado dixitalmente en Santiago de Compostela

Belén M<sup>a</sup> do Campo Piñeiro

Directora Xeral de Patrimonio Natural

